



**Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UPA 17-mut saqqummiunneqartussamik periusissiamik suliaqarnissaminnut peqquneqarnissaannut Inatsisartut aalajangiiffigisassaattut siunnersuut.**

(Inatsisartunut ilaasortat Kalistat Lund aamma Múte Bourup Egede, Inuit Ataqatigiit)

(Siullermeenera)

Atagu aallarniutigalugu oqaatigilara Demokraatini isumaqatigilluinnaratsigu, nunatsinni suliffiit amerlanersaat nunaqavissunik inuttaqartariaqartut. Naalakkersuisutulli iluarisimaarparput, misissuinerup nutaap ersersimmagu, kalaallit nunaanni inunngorsimasut amerligaluttuinnartut pisortat suliffiutaannut atorfinitsinneqartartut aamma atorfiit ilinniarluarsimasunik inuttalerneqartussat eqqarsaatigalugit. Tamanna nutaarsiassaavoq nuannersoq.

Aamma Naalakkersuisut isumaqatigaagut, Suliffeqarnek pillugu pilersaarut "Suliffeqarnek toqqissisimanartoq" tunngavigalugu suliniutit arlallit aallartinneqareersimammata, qularnaarumallugu nunaqavissut sulisorineqarnissaat aamma taamaattumik manna siunnersuut Inuit Ataqatigiinneersoq pisariaqanngikkaluartoq. Tamanna tunngavigalugu inassutigaarput siunnersuut itigartinneqassasoq.

Taamatulli oqareerlunga, oqaatigerusuppara matumunnga siunnersuummut tunngavilersuutigineqartut ajorusuutigakkit. Inuit Ataqatigiit tunngavilersuumminni inoqatiminnut isiginnittaanerstick uanga isumaqatigisinnaanngilluinnagara takutippaat. Inuit Ataqatigiit pakatsissutigaa. Inuit Ataqatigiit ilaatigut allapput, inuit maannga takkuttarput nunami pissutsinut ilisimasaqakkatuttartut, sivikittuinnarmik maaneeriarlutik angerlaqqittartut aamma maaniikkaangamik tunniussaqaarpiarneq ajortut.



Arraa; qanoq aamma taama nikassaatisoqarsinnaava, inunnut ullut tamaasa makillutik suliaortartunut inuiaqatigiit ingerlanneqarnerannut suleqataaniarlutik?

Demokraatini manna periarfissaq atorlugu avataaniik suliaortut tamaasa qutsavigerusuppagut, danskiugaluarpata, savalimmiugaluarpata, islandimiuugaluarpata, filippiineriugaluarpata allamiugaluarpataluunniit. Qujanarsuaq inuiaqatigiinnut kalaallinut sullisseqataagassi, piffissami sivikitsumi sivirusumiluunniit. Ajuusaarutigeqaarput oqaatsinik kusanaatsunik apuussivigineqarassi ammallu nikassarneqarassi Inuit Ataqtigiinnit. Kanngunaqaat.